



紹述先生文集

六

和
1495
6

早稻田大學附屬
圖書館
寄第
漢詩文
第 號
第 卷
此書館不外許帶出



和
1495
6



紹述先生文集卷之十一

未與木村信甫書
林書類
某因秋改令度於...

男善韶 校

伏啟不曠丰度既彌六旬屈指計日思念縣切昨忽
獲承翰教甚愜鄙懷聞九月十三日已抵秋田病軀
能耐暑跋涉斯畢敢不以賀想慈闈倚閭之望令昆
在原之情今既釋融矣辰下玄冥司令肅霜侵入伏
惟動履戩穀子闔家無事父母享嘉二季日長願不

庸室慮仁齋文集寫畢見附鴻信是望願勿必速兼
 蒙謝送行之章投桃獲瑤良用報顏願數年之後貴
 恙得痊西遊有日臨穎耿耿不堪翹佇之至仰冀鴻
 慈俯垂焘鑒不悉 貞享四年十月十七

復平山幸齋書 代家君

未挹丰采忽承翰教重以便面之貺多謝多謝時惟
 初寒起屈清勝欣慰何如承喻令姪玄節生與劣女
 某因媒妁之言修伉儷之禮自是與賢契為通家之
 好未遑奉問先荷慰存不堪汗顏之至承釋快子澤
 昌麟亦嘗與賢契往來欣慰欣慰劣息胤犬馬之齒

既長未有成立亦辱錄及別啟奉謝俗事蟬紛稽留
 奉荅萬惟焘察不宣 癸酉

與幸齋書

久服盛名渴仰惟劇不意通書于家君修通家之好
 亦辱齒及僕素性懶放本不足廁名于大方獎譽踰
 分益以慚懼然樗櫟之材遇匠石之斲何幸加之以
 此自慰耳貴邑學生江田某從家翁受學且夕往來
 亦嘗傳先生之名文事武備久切翹企今裁小簡附
 予上問隨分紛冗久稽報鴻私幸見恕察聞明年有
 上都之意不堪喜忤駑材臆技願蒙大手之是正寒

甚萬萬保畱餘布面晤之癸酉

復仙臺醫貞鈴木道竹書

千里神交聲應氣求兩賢相投乃能契合僕屏伏草
莽本無一長可錄徒讀書誦古以自樂爾何圖聲聞
過情叨塵聽聞以高明之見下問薄劣遠惠書儀以
師道相推重非所克當也就審德履安迪慰慰承諭
老兄刀圭之暇夙嚮聖學信奉宋氏之旨者有年矣
聞予先人反程朱之說自出己見始焉而非之中焉
而疑之終焉而見所著一二成書決然以謂聖學真
傳在茲嗚呼不隨衆而趨舍有見而後始從何其識

之確而革之勇也大抵古今之人有定識者鮮矣信
者未必見其是而從衆而信疑者未必見其非而從
衆而疑何以取正乎故曰是非之決不在衆寡而在
明暗譬諸有衆業乎野有一人麾而東則衆從而東
又有一人麾而西則衆從而西故世之所好雖賢智
者不免為之眩惑焉非衆好必察衆惡必察者豈能
實見而不蔽乎昔在漢之時世之言春秋者專據公
谷二氏而左氏不著漢之季有一劉歆移書太常請
立左氏時之宿儒羣誹不從至於棄官而去降至今
日左氏盛行公谷殆東閣焉魏晉已來歷三百年專

經之士父康成而兄子慎至曰寧道孔聖誤諱言鄭服非有一孔季產專古學所親恐其獨善不容於世降至今日宋學盛行而鄭服說亦殆東閣焉豈前之人皆愚而後之人皆智乎哉亦勢致然也宋氏之立說校諸鄭服則精宋氏之制行視諸鄭服則嚴嚴則或至於激精則必傷於高此先子之所以不得已於言也夫為名邪轢先脩以立己說毀之所歸為利邪背時好以行其獨疑之所與不為斯二者而立言其必有不得已者焉老兄其有知之矣冗懶少便殊稽奉答肅此布復言不盡意臨楮神往
戊戌五月廿三日

奉答光祿藤公書

辱賜盛翰薰誦數四恭審台候勝常慰沃之劇日者所奉瀆先集高序速運椽筆下賜再三捧讀感何堪言不唯文綵爛然眩耀耳目而泝道源披聖蹟以廟廊之貴下韋帶之士尊賢樂道之盛心豈唯先人之開顏于九京哉亦足以激勵世風振起士氣速刻之簡端冀附驥尾以垂不朽不日參叩以謝鴻私盛价告歸且迫暮忽忽奉謝疾書不謹萬祈崇照不備
丙申之秋

答今西醫宗書

春間枉荷過訪殊慰渴仰此回又蒙寄教音眷茲隆

厚兼惠海錯一器至感至感就審起居清裕為慰多矣比來冗甚久不到貴境數勞夢思稍間幸造高宅以奉面晤秋霖沙旬萬萬以時加番為禱不備諸弟辱蒙問及同此致謝

復水谷契長書

聆臺下之名熟矣忽蒙惠章副以珍詩爰償夙志為感伏審起居享福至慰至慰日者回村上子見託中瀨子山園記邨上子苛督欲逃無由衣冗之中黽勉塞責恐貽嗤大方忽蒙垂問感愧兼集多懶少便久闕奉報肅此布覆統祈崇照千萬將護以順秋令不

具丁酉七月

復中瀨契長書

華緘之惠佳茗是并感領厚意伏審德履多福至慰至慰向者因水谷子見徵記名園山川迢遞無緣寓目欲託之詞懸想曷得遲滋稽滯愧負殊甚村上子催督不措草草應課豈意千里寄音推譽之隆顧分曷勝勤此伸謝言不盡臨風引領千萬保重不備上

答梅岡省三書

勢州山田人丁丑九月八日

達濶以來裘葛幾更忽承手書仍審起居清勝至慰至慰僕家府及眷集皆無恙某蒙庇如昨叨荷枉問

感感向者石井生到篤實佳士也聞與君同里且共
筆研交脩之託敢不承當幸居止接近且夕往來隨
分勸獎共期進脩耳幸不掛念餘布面究諒察不宣

答東城元泰書

未遂觀面向蒙託書鋪人辱手書多荷多荷就審客
歲隨留臺到此春來興居清迪感慙之劇承喻久在
關左景仰先父之名行亦思識僕詞意懇懇謙冲之
情藹然乎楮墨之外僕何敢當焉先人隱居放言樂
往聖之道以終身嘗為人所知曰是而問及予亦見
好善不遺之誠矣僕叨守裘業訓課一二子弟欲使

畧識分義不陷于非僻焉耳何意虛名傳播遽以司
命權衡相推重殊增愧負然同其臭味豈敢自外况
公廨在近鞅掌之暇日夕追隨吾固所願漸暖千萬
保練以膺多福不脩乙未二月

答篠崎醫宗書

未挹丰度枉荷馳問前日自時杖屨處到辭意莊肅
殊見謙虛推獎之隆顧分何當僕叨承先訓唯知讀
書屬文為樂凡百人事無所曉解齷齪之材要不中
世用也一二文字不慎傳播過瀆高明殆名浮其實
文滅其實是懼何堪以師道相推也但先民有藹莖

之詢聖人擇狂夫之言老兄好善之薦其信聖人之道也遂慕先子之行慕先子之行也遂及樸楸餘愛惓惓叨蒙齒錄不遠千里尺書問及聊以此自解馬耳垣內橫閱函知友皆及先人之門時通書問時枝丈自客歲直衛京城屢見過訪殊信其薦志承皆交相熟時枝丈任滿將東草草復此想東歸之後頻頻追隨談論有益山川悠遠合并無期茲為恨恨耳漸暑保攝千萬

復濃州白田生書

前年枉書縷縷數百言足見多年研究之力欲速謝

答而世故蝟紛加之性命之說非立談之可能盡故荏苒歲月殊負踈慢承諭先子所著書中非宋氏性即理也之說而卒不免流于善惡混之說此讀之未精也大抵聖賢所云性者即今世一不識字人之所云性者乃稟受之謂而宋氏所謂氣質之性也其皆可以為善故孟子謂之善也然物之不齊物之情也雖同為善而亦不能無少異同其甚也或亦有少變異猶草木之花實本自有一樣形狀而亦不能皆同一樣或亦有甚異者也字義所謂非謂天下之性皆一而無惡者乃指此以為言非為性有善惡也蓋就

活人上自千差不齊中看出箇善也至宋斥之以為
 氣而求所謂善者于寂然不動之先則非聖賢之所
 謂性善也程子曰人生而靜以上不容說才說性時
 便已不是性也張子曰形而後有氣質之性善及之
 則天地之性存焉故氣質之性君子有弗性者焉皆
 此意也此與孟子之意異矣唯當平心易氣據聖賢
 之言精而求之自可得之固不待予之多辯嗚呼道
 之在天下日星炳焉孰敢張一家之私言以輔前修
 廢衆論哉心之以為是者亦欲同之于人人之情也
 足下之篤志力學聞之于廣瀨生者熟矣故曰見問

及粗陳管見其亮察之萬萬自愛不宣 戊戌八月

答堅田生書

山川阻修忽軫遠念書儀并至賀茲新禧殊荷盛意
 就審起居安迪慰慰勉勵之志溢于楮墨幸努力以
 成宿志所大望也秋暑尚甚保衛不具 庚子

答野添生書

春初蒙寄手教且并賀儀慶茲新正感甚書達甚晚
 殊稽奉答幸恕即日動定勝常否想讀書且有緒僕
 眷集安裕幸不懸念正遠臨書不堪耿耿 庚子

答安藤大藏書 號擴所

名述先生文集 卷之十一 世籍堂藏

春間遠辱手教副以連篇新詩殊荷感念爾來日為
 問字人所絆歷夏涉秋稽留奉答踈慢之罪不知所
 謝就審興居萬福弟向通仕籍辱同僚之契久服
 盛名未由披雲忽蒙垂問益切馳結詞翰之妙曷勝
 欽歎大抵武弁之士多忽文事雖或有志於學亦迫
 於公務不得肆力契丈在藩府業劇之中能知好學
 充今世之所希見况崇慕吾先子之道遺書及拙述
 文字常加探討且感且愧但願執掌之暇從事於聖
 賢之言日就月將以成其所志居官執事者上可以
 裨益乎君下可以潤澤乎民幼學壯行實有所措與

獨抱遺經空言無施者大不同矣何日合并以究所
 懷高作數首僅次韵其一以酬盛意時惟寒甚千萬
 保重不備
壬寅十月廿七日

答琴臺拜琦書

祭戟西臨韎韜爰從忽睹朶雲嗟茲衰朽再三捧讀
 且愧且荷乃審賢契從學之日久交友之道周古之
 傾蓋如故言相知心也今子既尊聖人之道而其師
 友輩討者非當世之名卿鉅儒則吾先子之門人
 故舊也雖未挹羊來豈敢自外瓜期尚遲一年官暇
 隨早晚見過幸多勤此伸謝諸留面究

向辱傳瀨崎舅書適冗草率奉謝會不經意恐見訝也乃披瑤函誦華箋冲挹之懷萬學之美未接光霽已仰高志之所趣聞今年宿衛京城周歲之間地則咫尺若有事到坊中幸賜賁臨有委勿外更冀以時珍重不具

答博泉書

二月初五日貴邑人上都辱托寶箋就審德履清裕曷勝欣幸喻擬河汾太平十二策成一書近日錄寄尤所欲捧誦云先王之道禮樂陶鑄以成人材後世

以一定之準是非百世為可疑也縷縷垂諭足見研索之工日進熟高明之見日新不敢自是而亦蒙下問且感且愧便人在門促報忽忽覆字幸恕卒易不

具壬子四月十九日

去歲遠寄華緘垂諭丁寧未挹道範已為舊相識想且蒙刻寄圖書三顆刀神斧意工奪造化殆超三橋雪漁而上之時有著撰已頻用欵識蕪陋之詞頓覺生光輝殊謝厚意且見屬錄寄拙文一通不佞時有文字多不滿意無千里遠傳足副高意者遂致遷延

歲月且稽奉命近遞送人頗頻促報責以踈慢為此
草草布謝拙文章埃重錄呈餘意悉于渡島門因兩
丈書中向暑千萬保練以膺多福不悉壬子五月十五日

富高松氏書

客歲九月十三日華筭自弟長準處到未接丰采叨
荷推重意思勤懇懇數百言而弗已何其悅學之
殷而搗謙之甚也漢製朱碗二笏殊見珍愛唯恨東
西千里盍替無日然往聖之道未墜于地先人註述
之旨亦稍刊布况桂川子及先人之門講討有日聞
契丈通家之契日相過從疑難必有其方師友

薰陶何煩遐求近日長準西上若有貴幹不憚附託

草草佈謝口所欲言非書之所能究也春寒未退保

蓄為幸不具壬子三月三日

與若水書稻義字宣義

前日蒙借賈述管公傳固見記事行文之簡暢今寫
訖因江田生還辭多謝多謝近作高文投下為幸餘
非面莫究辛未

答實松賢契書

客歲遠惠書問殊荷垂念多懶少便不得奉命已更
表葛美豈勝愧仰就審乃翁齒益高而德益邵賢契

日夕侍奉家庭之間互相講討此今世之所希見真樂事也僕蒙庇如昨與一二子弟同好之士日研味墳素尋繹先人之餘論以為常爾書肆勤懇懇推我以人豪任我以道德文章之重非區區之所敢當也聖人之道昭如日星遺言微旨布在方策唯冀勿忘心勿助長樹風聲于一方以闡明往聖之道正遠以時加衛幸甚

辛丑十一月

復道香師書

前月奉書附快師想既達左右前書所言仁齋送序事項又得其詳因審告之往年對州大塔全安來於

京師從家府遊嘗因疾命往朝鮮寓金山浦浦隸慶尚道有館接待國人全安在彼以序示府尹某府尹大歎賞曰今此文無奇字險語平平鋪叙其學雖不可知想講道學者也中夏以文鳴者亦無此之比其論儒釋處固精當令釋迦見之固不能不抵掌焉府尹掌慶尚道事階正二品擇有文學者差叙偶失姓字又有一通事官嘗使于本國者曰往歲因貴大君嗣位聘于上國邂逅諸士詩雖畧有可觀者未嘗見一篇文字亦未知有伊藤維楨者豈以明人文字誤示我乎甚美文之入格昔梅堯臣作雪詩西南夷傳

之至織弓衣夫以華人得戎夷歎賞尚猶誇之上于
 簡策矧東方素之文材家翁之作傳播至瀛豹之國
 真希觀也且曰歸京示同寮諸友不識朝鮮羣僚所
 評如何所喜師之高名與序共播揚三韓之地比又
 錄邪說暴行論往未得音耗餘布嗣音

復松宮觀山書

四月八日附東海篠子書并八月三日別幅自京衛
 德田丈處到兼喻東海子將西上有故不果千里間
 關遠蒙翰教示諭再三殊荷眷念僕別無一長可取
 徒讀書誦古不棄葑菲叨蒙齒及謙冲之至推譽之

隆且感且悚非取善之周且厚曷能如是且聞學武
 從仕文事武備兼資惟難講武之餘從事學問足見
 高明之不苟焉而止何日合并以究所懷正遠千萬

保衛 癸卯十月十三日

答或人書

承喻誠者天之道也誠之者人之道也天人一道故
 夫子喻曾子曰吾道一以貫統之可否如何蓋以夫
 子之告曾子本是平常易識之語也自理氣體用之
 說興而以為事之大小多寡物之輕重厚薄千狀萬
 態散殊不一而至語其體則只是一理非知致物格

者不可得而知也。曾子是時隨事精察力而行之，將以有得，故特以告之。而曾子果契其旨，即對曰：唯及門人問其事，乃借學者受用之目以喻之，曰：忠恕而已矣。此非夫子之本意也。何者？古人之學無體用之說，凡聖人千言萬語皆就用而明之。若至言其體，則雖堯舜孔子之聖而有不可得究者，而又有最不可解者。理學家之言曰：不善之生皆自氣之不齊而所致。理則純粹至善無些邪惡，然天下無理外之物，而萬物統體一太極，則所以使氣之然者將誰使？然邪然則所謂理也者亦且有不善者夾雜於其間乎？理

之不可得而窮，孰甚於此？所以聖人之學無即事窮理之說。曾子嘗曰：君子所貴乎道者三，而邊且之事則有司存。又曰：吾日三省吾身，而其事皆不過接人應物之間。則知曾子之學識其大處，專務力於躬行之上，而不即凡天下之事逐件研究其理，亦可知矣。然則夫子所謂一者，將何事乎？蓋聖門之學以仁為宗，而求仁之方莫近於恕。故曰：可以終身行之者，其恕乎？夫忠以盡己之心，恕以付人之心，皆所以接人而可以至於仁矣。故五常百行其事雖多，而忠恕足以貫之。此曾子所以為門人述夫子之旨也。今詳尊

喻與舊說不同夫聖人之道固是至誠誠貫天人然此自人而贊天道聖人之妙則固可言也聖人自道豈謂吾道誠貫天人乎哉鄙意如此不知是否若有未悉幸再賜教

荅堅田隱伯書

一別倏忽涼燠屢更光陰荏苒又屆新正遠寄尺素副以賀儀繾綣之情殊屬感荷承喻起居佳勝為慰僕家眷各平安幸勿勞懸念也書不盡言草草布謝再荅東城元泰書

向辱惠音忽忽布謝旬日之間重蒙寄書及新詩數

首且丐郢正感悚兼集大抵改詩最難拘于聲病對偶加之體格各異好尚不同輒為改修多失主意况高作清新穩雅何勞斧鑿藏諸篋衍以吟玩耳非敢慢也且蒙問月課文題別帛錄往公暇若得構詞幸見示及鄙意有所不安何敢憚於修改餘附面控不佻

乙未二月二十九日

荅石井彰信書

客歲十月朔日書平井春城生齋到副以土宜一品千里神交如接面譚懸念之情溢乎楮墨之間何其信道之厚而執己之謙也就審興居安適至慰至慰

春城生父祖已來與予為通家橫山生亦嘗在京留
學聞皆與老兄交相熟曰欽慕先人道業感戴曷堪
僕承家訓株守如昨叨信傳聞枉蒙獎子愧荷之至
藥性歌序之託尤非所當也唯一二文字聊述相識
之契託于書尾以塞責焉耳氣序派易忽履端惟
冀保衛以應新禧萬祈照亮不備 乙未

答向井茂助書

去年重陽書自渡邊生處到未遂識荆忽辱翰音尤
荷欣幸冗懶之間倏爾改歲報答稽滯為怨為怨僕
守裘業畧曉章句本無足稱道者過信虛譽推獎之

隆曷敢堪當聞先父所著一二成書嘗入雷矚素見
信依尤為空谷足然之想貴境之距此不知幾百里
也雲濤萬壘道阻且修然斯道之在天下東西南北
莫不準焉垂喻縷縷不唯見相信之厚亦足以見斯
道之莫不同也蒙喻爾後時遞書問互相質正詹詹
之言何足相答然心以為是者豈吝奉告草此抒謝
統祈照鑑春寒自愛不備 乙未

答廣瀨源左衛門生書

書到副以剡藤十帖志尚之薦相愛乃至於如此慰
甚慰甚然窮巷寒邑無不有其師士農工商無不有

其業何必儒其服儒其言坐乎按席而後為學邪但
定省之暇時而遊學就師親友尊其所聞行其所知
庶幾在乎天地之間不負為此一人矣秋冷自愛萬附
面晤不備享保丙申八月日

答管致齋書

曩者森下二生之東歸語云老爺今茲年登八袞敦
獎後生老而不已願裁壽詞一章見寄為相傳也因
念老爺昔者在京師與一二耆宿米川八尾諸老相
追隨時亦與先子講習先子即世之後又蒙枉顧殊
荷繾綣屈指始終殆四十餘年矣非信道之厚何以

久而不替至於如此耶仍賦古體一篇託二生以呈
聊以報奮好焉耳何意遠寄書問副以謝儀感哉之
劇海山迢遞合并無期漸寒保重是祈享保癸卯

復上原守一書

便中辱書自京衛德田丈處到千里之阻匪由紹介
華絨鼎來殊荷推隆斯道之在天下無間親疎遠邇
聲應氣求固宜欽慕僕之無似何足動高聽因想賢
契鞅掌之暇覃志古聖賢之書以僕之叨承先緒廁
名于當世諸儒之末意其或有所知遠枉馳問慰藉
之至勤勤懇懇僕豈敢自外傾蓋如故吾敢於賢契

望之矣俗冗相仍殊稽奉答幸恕心寒千萬保衛
十月十三日

與渡邊希憲書

去歲十一月朔日手書直至本月十八日方到奉別
益久景慕益切忽挂佳訊慰浣無限教言縷縷所以
愛助我之意甚厚矣唯恨無由一得會面祛吝去踪
以進所聞耳凡同志者不得同處同處者不得同志
念之悵然不勝於邑夜深無人空齋燈幽靜思昔日
同遊之人或東或西如落葉之隨風而散不得同處
之憂人人皆爾然而男子之生當有經營四方之志

豈能老守鄉井區區自安乎然人事之不常而友誼
之難全往往如此僕年迫南冠猶飽繫一方株守如
昨唯慙日出而興日入而息今日如此明日亦如此
今年如此明年亦如此其所為有補于天下之事乎
有益于世間之事乎只浮沉于文字之間為蛆蟲蠹
魚之見以自終日耳天地之覆載我父母之生育我
其意豈如此乎但未知鳴珂帝衢我其冠朱其轂乎
將晦迹韜光野其服槁其形乎詩曰靜言思之寤辟
有標所示筆記二則三復吟詠紙弊墨渝切中學者
之病益足以見其立志之確進修之益雖瑟居遐方

久違函丈，不曾少怠。祇增日侍師席之愧耳。但其文字不穩處，一二塗抹，以塵電燭，呈愚得之，一二耳。非敢以為正也。高覽以為如何。大抵文字雖學者之餘事，然日東國于海隅，與中夏阻隔，言語不通，嗜欲不同，故世少能之者矣。唯兄益以勉勵，勿墮素志。今鄙文若干篇，謄錄以往，倘有不穩，幸以見教。日者與諸友相共著仁者無敵論，以未脫藁，故不錄示。所不及者，不惜鐫海實所望也。庚午

奉復右司負外郎藤公書

向賜寶笈，再三薰誦，殊荷盛眷。嗚呼公，卿不下士，久

矣。豈士之德不古，若耶？將士之自待甚輕，而不足以動公卿耶？抑雖有其人，而世道日渝，士氣不振，世唯知富貴權力之可欣慕，而不知尊德樂道之所致耶？何其聞乎古而寥寥乎今耶？閣下曾承神明家傳，簪纓夙翔臺省，敷歷華近，已致聲譽。世之人之所瞻仰，以願拜下風者也。而不予鄙棄，以身先之，繼賜翰教，慰藉具至，豈不以區區虛名上瀆高聽為蒞莛之言，可以裨啟沃之萬一歟？非好善之篤，何以至之。僕寡陋何敢當之。然不才如僕者，尚且就問則世之庸敏茂懿之士，莫不欲進以善道，告以善言，則其德之日

就月將將不可量也但恐有始有卒自古所難務敦
其實終始惟一則後來之遠到可必期也近將奉候
以竭衷曲千萬保重書不盡意恐惶不宣
享保己亥五月十一日

荅野呂瑞菴書

向者寄示白雪一章漫屬和以塵視聽近者得四月
二十三日手書慰謝丁寧且蒙惠龍劑一笏文房頓
增光輝感謝感謝因便佈謝書曷能既時方向暑千
萬保練不宣
癸卯五月十五日

復杉原春菴書

向者解后于龜山倏忽陳迹已垂三十霜矣聞老丈

今尚強健寓于三州遣令郎就學于京師曷堪欣躍
今茲大野戶村翁來具審近况近又令郎踵予門且
齋華牋到捧讀再四殊屬感戢令郎謹薦有望幸勿
懸念乍冷千萬保蓄書不盡意統祈焘察不宣
乙巳

荅岡田元昌書

華緘一封與蠟炬併到千里慇懃殊荷相厚之意獲
聞起居清裕感慰之至想義塾之設日益就緒信從
日衆事業日著此固君子之所樂聞况倡先子之
遺旨風聲一方在亂不肖增劇感念向錄呈記文亦
何足輕重叨忝獎謝媿悚媿悚餘惟以時保衛區區

至懇不悉 乙巳九月廿二日

答真野甘正書

春間並河生之造都辱手教輕篋三柄玉版十刀并
至殊荷厚意謝曷能堪書中具示契丈出身始末立
志從學之大體何其意之誠而好之薦耶英弟幸辱
同寮之契嘗傳芳聲契丈器識之偉文藝之美耳已
熟矣加之私淑吾先人之道尤極欽仰速當叙謝以
報知遇之情初夏因人促行詣勢州滯留一月餘爾
後襟事填委暑濕致困殆廢應酬久不奉報踈慢是
懼英弟近有書報平安且促奉畬想日夕過從幸憑

提擿並河生平善日親書冊時時譚及貴邦事恒切

馳仰因便拜狀餘惟以時保衛區區至懇 庚戌十月廿一日

富岩田林鳳書

一別以來倏忽已過二紀時時尚想風采向者田中
勝文氏宦事貴府上都之次相遇談必及老丈事云
薦志好學士林寡儔不意千里之阻公務之劇不忘
故舊娓娓千言叨荷推譽取善之周信道之篤深所
欽仰且寄高位感悚勝文氏生稟純厚學亦可進也
當速奉畬以謝厚意蠟務冗迫且見責拙和陽春之
調難速屬和勝文氏書亦來頻頻催迫嗣當奉呈以

謝疎懶幸諒察焉壬子五月十五日

寄並河損齋書

郇雲之惠副以多儀之貺戀戀之意久而不渝感謝何堪承喻履端之慶與物更始起居清勝慰浣之甚僕渾家無事履茲新正椿萱並茂棣萼無故枉蒙存問殊荷至意在京貴眷日夕過從勿勞遙念仲氏學益富志益切前程可望也但動為造化小兒所惱湯劑不離側比來清健差強入意季氏謹厚不懈亦可喜也諸弟隨分勸誘日督課業願稍有所成立而克負折薪是望聞鞅掌多故為阻歸省然孝子愛日不

可後時稍節冗費暫候宦暇為告寧之計若致遲緩恐為陽亢宗所罪衷曲縷縷書不盡意千萬保吝不宣壬午

謝伊良子叟書

古謂好賢如緇衣既賢之則為之改為其衣之敝適其館授其案厚之至也僕之於老兄非有鄉里之好非有葭莩之親與先子同持而不相面觀其書而慕其人慕其人而問其後遂及僕向使令郎就予塾肄業則已為通家之契近同志修葺講舍蒙老兄捐資率先為之助修土木之功不日告成嗚呼不唯見尊

終述先生文集 卷之十一 古義堂藏

賢信道久而益篤，又喜吾道之不孤，先志之永傳，速當奉候，以致展謝。偶罹小恙，百事荒廢，加以冗紛踈慢之至此，貢薄物以効微忱，伏祈莞納。秋令漸寒，千萬保護，以膺多福。不宣。
己酉

復香月牛山書

契濶多年，馳結殊劇，忽辱翰教，就審道體勝常，慰甚尊庚，方向大耋，強健不衰，文詞華贍，筆法端好，且見頤養之有素，客歲所呈藥籠本草，序聞近已上梓，併刻深愧蕪劣，何圖推獎踰涯，徒增恐悚耳。且蒙惠示間石研一方，千里面晤，媿媿弗措，借我以言，報我以

文房偉器，感何可言。漫裁一律，肅此佈謝。餘憑情亮不備。

瑤光瑩一鑑，佳鏡自關西。產自賽龍尾，琢何成馬蹄。遙遙千里信，懇懇數行題。中夜濡毫處，應燃太乙藜。

甲寅歲夏 五既望

與復軒書 吉田渙 字東蓀

向者道熹還附書，必達久不得東京之耗，起居住勝否盡心古義，若到速璧，是望今間杉生東上，附書公孫丑，謄訖幸見付，官冗必勿亟未畢，尚竢秋信，其久欲得荀子書，坊未及刊，華本亦甚罕，若都下見及幸

名述先生文集 卷之十一 古義堂藏

寄一部速納價在京貴眷諸友並無恙不煩念及某
蒙庇如昨徒守陳腐愧愧吉富二生想日日交修冗
迫不別啓望道意日下久霖物皆黴腐東州蒸暑子
新到不服水土尚冀千萬保留臨東馳情不一一未

答松田春竹書

糟谷八郎丈之東上得領仲春九日手書就審前年
貴體遠和久不見寄書爾來平安何幸加之嘗寫寄
曾子贊詞嗣蒙謝音殊荷感念苦無便久不奉報愧
負甚矣八郎丈公事忽忽不蒙貴臨為恨速馳一价
具述其由詞儀鄭重足見相信之意幸為致聲何日

合并以究所懷僕齒日邁而幸強健讀書寫字凡百
應酬猶前日也四弟皆無恙多就宦途索居他邦具
蒙存問感甚近雲州矢野丈過京言與貴邑地相接
有便因託彼處以呈報京中失遞送之所幸勿罪稽
迂統祈諒答不宣丁未

答杉山文理書

奧州士人
戊申三月

去年九月廿三日辱賜書自大村氏處到且見惠東
產摺扇三柄感甚雖未挹光範千里面談殊蒙推重
之意且愧且荷尔來冗迫久稽奉盒幸祈灼察不宣
復清泉翁書

春初辱蒙存問，日行玉趾之豈然殊稽奉答不佞，且有泉南之行，遵海而遊者，浹旬幸怨遲滯，雅製一冊，足見閑中之用工，吾道之行有望也。一二附管見，唯高明裁焉。餘非面莫究，不宣。
庚戌三月

復大賀東庵書

久不接書，馳想甚矣。忽辱存問，且承磁鑪之貺，殊屬欣荷。足見相思之誠也。池島藤澤兩生俱無恙否。遠地信疎，幸為致聲。時向暑濕，千萬保練，不具。
享保辛亥五月念八

答橫關書

向者湯川生之西上，蒙寄翰教，連領累幅，禮意勤重。

副以毛穎之惠，感載之至。一別如昨，已踰十餘霜。審聞動止佳裕，曷勝慰浣。美喻嘗欲為儒業，迫于親眷之不欲，遂習醫。及予先子之時，裁書白志，不得如所。欲尚抱愧負，足見足下立志之正，久而不渝矣。然追悔前事，滯著胸次。於當面事體，必欠慎重。今既業醫，只當精其術，廣救世之廢疾，疲癯列于古名醫之流，亦何不可及。先子之門之人，為醫有名者，亦多醫。豈人之所不可為之事乎哉。新文一卷，蒙徵管見，一二有所思，聊以奉告。愧甚，唯冗懶多事，久稽謝答。草草布字，書不如式，統希鑑諒，不備。
癸巳

卷之十一
答稻留希賢書

向得尊父手書，僕方斬焉。在衰經之中，凡百應酬，多致稽滯。不時答謝。又得去月二十七日足下書，就審貴眷各已平安，慰浣是劓。承喻本月十二日，當吾先人小祥忌辰，蒙寄悼詞五什，感感荷荷於以見尊師信道之心，久而彌厚。先人常引接後進之士，如恕不及况子以敦敏之材，強識之資，親炙有日，其所造就，何可量哉。是為恨耳。然先人遺書欲陸續登梓，客冬既刊語孟字義，竣功今往乙部，研味有得，不異於升先人之門而受先子之誨。其中議論旨趣與先儒

之說異處，間或有之。若欠領會，不憚問及。趨庭一得，庶以相告。先子生存之日，嘗默寫四書正文，見寄先人既嘆其強力，數數玩閱。頃者裝釘，做三巨冊，閣諸座右。時以示人及先子之門者，莫不嘆叱曰：何筆體之似吾先師也。這回又得文字數紙，觀者驚異，莫不曰：神童哉。神童哉。聞謄完文選六臣註，愈見勤苦，恐徒費日子，枉勞精神。莫若用力於他好書。若作文，須讀韓柳歐蘇等文字，冀成不失作家本色。大抵有才者，親者譽而疎者忌。聞譽則誇，聞忌則沮。是二者業之所以不成也。尚莫曰譽而誇，莫曰忌而沮。直尚友古

人以列三不朽是所望也千萬珍愛草草不次

富水足安方書

聞足下之才名十餘年矣未見足下之文也頃者有人傳邇角就觀封題則八月廿二日足下寄僕書也始見足下之文矣尚未識足下之面也伏審夙好問學尊信語孟二書又因人傳虛名叨蒙傾想見求質疑娓娓百數十言而弗寘雖未識足下之面已神交於千里之外矣大抵世之知為學者莫不取信於聖人之言聖人之言莫不徵之彛倫質諸聖人之言而不合則非教也徵諸彛倫之間而不行則非道也

亦何多岐亡羊彼是此非之爭為足下平昔從事於語孟二書則既有所本矣以如是之才如是之志自是以往積以歲月則左來右去多多益辨輻湊于數目提于綱後來成就一段大事業乃在足下掌握之中耳未即承教馳想亡窮惟千萬為道自愛不宣
十月二十三日

答野呂瑞菴書

得五月廿九日書因審動止安裕為慰蒙寄北地佳筆二枚快鬆殊稱意感荷之至今夏都下氣候不順病者十室而九不知貴境如何救療之餘不廢讀書

否兀中草草統祈炤鑒不倫甲辰八月四日

答高塚某書

因不相識之人得不相識之書我無一日之雅而神交乎千里之外豈非以民彝物則推諸四海而準天下之好惡一也故乎先子立言著書唯聖賢之言是信待子雲乎千載之後既故向三十年門人故舊互相告語黃綠輾轉託交同盟何圖子在千里之外觀先子之書服其遺言因都人之到修書求識非信道之薦而見道之明何以遽獲夜光之暗投被推獎之過隆為裁數言肅此佈謝佗日若西上幸為枉顧

風不堪悵然之至便遽殊草草統祈情亮不具參州西尾

管下農家子自四條山田氏歸京而寄書癸丑二月也

答竹堂書

一別修焉裘葛幾更屋烏之愛延及無似枉荷記存客歲松谷子之西歸蒙致意獎譽踰量赧然之至嘗期尺素裁謝以叙故舊冗懶之間年已改矣不道重辱華牋自松谷子處至意旨勤渥同道相愛之契比昔有加兼諭先子所著諸書已經電矚一二有所欣服最切感刺大抵斯道之明昭晰乎宇宙非聖人之所得而專也非愚不肖者之所不敢與知也故自古

賢人君子之言行不能無一長一短豈故為之短以遺後人之議乎哉亦豈為其長足以盡萬世之是非其言足以絕萬世之言論乎哉蓋道之無窮故學之亦無窮古之賢者專心致志以求之雖蠶絲牛毛不遺餘力而一出一入之間尚有疾乎後人之說學者苟有信乎前則信焉可矣何必強異苟有疑乎已則疑焉可矣何必雷同天有顯道厥類惟彰聖賢彞訓炳若丹青唯其是焉而已矣先子之所立蓋亦如此僕羨籍遺緒從事乎文字之間株守如昨敢因惠音聊此布悃聞向者應肥侯之辟通仕藉夏間隨節西

上敢賀敢賀途間枉顧幸究餘論萬萬保留不備

二月廿六日

復南部平澤昌達書
三月下澣書到并惠黃精一器感甚比來冗懶相因殊滯裁謝幸恕踈慢嗚呼三千里之途也不以為遠矣二十年之契濶也不以為踈矣鄉人羣誹疑乎其學術之不純也不以為憾矣因先人遺書之遠播也頓革舊習誘進鄉里至相謂曰見告之晚矣勤勤懇懇詞意兼至猶咫尺也猶昨日也何其進道之勇而徙善之果也蒙諭將來時通書問以相質心若有

得何吝奉告心遠千里自重年九月

復盧通事書

前歲遠寄翰教垂諭丁寧殊辱知愛豈止傾蓋而故已哉承諭先子遺書嘗見佩服將因不佞知所未知聞所未聞何敢當之大抵道不過倫理綱常之間而應事接物為大非只管一箇身心便了也從上聖賢君子之敷言昭昭乎簡冊之間先子費一生精力闡發無餘固無俟乎予之喋喋但意貴鎮望閩廣而控吳越東箭南金之美輻湊而到必有俊人才子之蹈海而來者賢契涿郡之望玉川之族稟茂懿之才抱

勇往之志日操華音與之周旋其必有相益冀幸見教爾來小柳兄頻頻書來促報冗懶相仍殊致稽滯多罪多罪比日池尻生將歸寧親肅此奉畬旬暑統祈保衛便迫書不如式亮答不宣乙卯四月

紹述先生文集卷之十一 終

[Faint bleed-through text from the reverse side of the page]

紹述先生文集卷之十二

引類

壽長岡先生七表詩引

男善韶 校

古云敗軍之將不可以言勇亡國之大夫不可以圖存今夫醫以仁壽之道也而其質蒲柳不能康強者其術亦不足信也名醫長岡鞠堂老先生年超絳縣尚能矍鑠其濟生起死躋民於仁壽之域不亦宜乎古稀之歲令嗣賢伯仲請當世諸彦歌詩以進其壽

予時弗及與焉頃亦微予言因追而書之以奉祝詞

云詩見詩集
丙子臘月

豆山挽詞引

古豫凶事非禮也故絞衿衾冒死而後制仲子之賙
春秋譏之然諱亡者不可以語存忌死者不可以言
生亦有其說蓋輓之為作始于漢時田橫從客致其
感慕悼傷之情薤露蒿里是已及其彌文也有自輓
者有自祭者有自碑者不亦好竒之甚也乎豆山氏
亦好事之士也齒未滿知命自作臨沒詞一章徧請
所識搯觚之士先作輓詩外三十八字各冠之句首

吾亦如之皆致悼傷之意既竟微予片言以弁其端
予謂豆山平生好鞞畧之策且耽歌詩不屑世之聲
利紛華今遭右文之治而深韞弗露然其素志不欲
視死生如晝夜踏白刃如康莊也哉自輓之作不亦
宜乎予始以其甚竒姑辭之懇請弗已因喜其死生
一節又能知好風雅為叙其大畧諸君悼傷之意思
亦如此

勝田氏族譜引

身體髮膚奉其遺體尚莫敢之毀傷况其所自出與
其所自別為之子者而可蔑而不錄乎詩書杯圈慎

其遺澤尚莫敢之慢棄況其所產之鄉與其可履之迹為之子者而可忽而不傳乎已之於父既如此則推之父之父亦然推之父之父既爾則溯自祖以上至於無窮亦何不然古者生也相宗死也相服故族有所攝而情有所繫不然則服未盡而情已睽視至戚猶路人也其何以克光祖業而裕後昆也哉勝田氏之先出自皇胤清和帝之孫鎮守府將軍經基方應和中始賜姓源其後九世而為信濃守諱長清承安中賜采甲州小笠原其後十一世而為諱義長世為阿州守護居三好鄉亦襲任信州至德中在

皆因邑而氏遂分族焉義長之後世徙家于江州勝田九世孫諱尚長隱晦不仕遂以勝田為氏尚長之子良次始仕京極侯于丹州田邊子孫相繼皆登臚仕後先輝映為國良臣其孫良覺譜其先系蒙徵序于予因閱之別子為祖已來凡本支之所不疎戚之所叙鄉貫之遷徙官業之履歷各表其諱附以事實網張日舉記載最詳祖業於是乎可光後昆於是乎可裕其所以奉其祖之澤者為如何哉為書其端云

享保七年
壬寅夏五

贈女益歸越後引

人之在斯世也相資以有生有德者以長人有能者以治人有力者以衛人有財者以養人有技者通功易事以益天下斯道不明而為其事而還棄其本者往往而在於是乎慎術之說興焉今夫六氣相淫以成疾則不能不望治乎人而精其術者診候之砭鍼之湯藥之而斯人有以全其天焉醫之益乎人也大矣既獲其救則必酬恩亦人之情也然世之業焉者不究其本而徒逐其末遂使濟生之仁術轉為糊口之捷徑岐農之遺方變為巫祝之利糈不患其術之不精而患其家之不饒不暇患其人之有疾而唯恐

其人之無疾其術之不良亦宜譬諸兵以戢亂而佳兵者思亂關以禦暴而私關者為暴此豈古之道乎此豈其克之本乎今村生玄益越後州邑上鎮醫也在都三年頃將歸鄉丐一言於予予嘉其為志欲知其所以精其術為贈數言云

甲午上巳後一日

慥菴詩艸引

出事長上入事父兄乃子弟之職分子服膺先聖之遺訓庶幾竭焉而未能也暇日為韻友道侶所招致山林亭榭游焉息焉或祖親朋之行或飲故人之廬觸興而抒懷適趣而有詩曰彙而書之為改罷長吟

之資焉耳 丙子四月

... 其言思慮固以爲愚而於聞法或疑其非也豈古之直也
... 其人必無其弊也夫不其亦宜警其以慎而自
... 其言思慮固以爲愚而於聞法或疑其非也豈古之直也
... 其人必無其弊也夫不其亦宜警其以慎而自

贈言類

贈吉田生東行言

人之所以貴乎聖人者何也聖人亦人焉耳以其能
盡人之道而欲人之學其行事而盡人之道也故其
一言一行悉皆載之簡冊以爲萬世之法程向使聖
人獨能行人之所不能行者而非人之所可學而至
則其記言行者亦不過徒贊歎想望以爲如天之不
可及鬼神之不可度焉耳何其謬耶聖人之所以爲
聖人者亦就常人之所能爲而有不可及者存焉豈
人之所不能爲哉患人之不肯爲而已耳吉田生嘗

名述先生文集 卷之二十三 古義堂藏

在勢州來學于予亦知學聖人之道者也聖人之道
 平易近情存乎事實非人之所不可學而至亦熟之
 乎先子之書矣頃將東行丐一言以祖之欲其自人
 之所可學而至以馴致推極克要其成聊書此以贈
 之云 享保甲寅
秋七月

贈邨岡元貞生歸信州言

村岡元貞生自信之誦訪上都寓于予塾將三年矣
 近者治任將歸自恨其親炙之未久及其丐贈言乃
 謂曰人固不可無教而最不可以不自立焉故夫子
 之教無所不至而人不皆顏曾冉閔者不能自立故

也苟不能自立則雖日受師父之耳提誦聖賢之遺
 言而徒糜歲月乎黌庠之間而悠悠沓沓卒無成立
 之日苟知自立則親師友時講習固有相觀而化之
 資離羣索處亦豈無自修之益哉蓋割鮮擊肥燔炙
 烹膾大庖之所職而食焉而克其體壽者在人而病
 者則不能吾非大庖也傳大庖之言而調味者也而
 子亦非病者也冀因子之言而味道腴飽膏粱以期
 充實而光輝孟子曰梓匠輪輿能與人規矩不能使
 人巧亦此意爾再遊有日刮目以待 享保甲寅歲
七月下澣

贈弟長準赴筑幕言

紹興元年七月下澣

自先子開門倡道蓋六十有二年於今矣壯而衡門之下獨抱遺經以闡明聖人之道為己任奮不顧身持孤論立獨見不有求知于當世之人一二親厚者勸其稍遜言以徇時好先子不有改其故每曰千歲之後必有子雲隱居放言自若也徃聞已久衆論稍靜先張之孤後說之孤中歲而家道甚艱予與四弟三妹坐食在家親厚者亦勸其使子弟就仕出贅以為後圖先子亦依違不有遽從每曰人生墮地衣食自有分何必汲汲從容自得晏如也既而先子棄世遺書稍布于世雖未至迴衆人之視聽而讀其書知

其人者不唯服其言之可信而亦慕其德之可欽歲戊戌仲弟長英釋褐備藩今茲四弟長準亦將赴筮幕蓋及先子之門者分處諸侯之國稱道遺德以丐其錄用也嗚呼存歿六十年間先子之言久而有徵臨行同志多有贈言長準丐予亦一語以叙別曰告之曰予以屬在長叨主宗盟欲訪先子之道者必咨焉詩曰鴈鳩在桑其子七兮淑人君子其儀一兮先子之所以欲成吾輩者豈二其儀哉然則欲駕先子之道以傳之當世者豈吾一人之責也哉漢之馬氏宋之竇氏皆有五子克揚家聲庶幾汝之亦服先子

之道修之於其身傳之其同家執友與其士民以毋負明府拔用之盛意焉

時享保八年癸卯孟夏朔日

贈兒玉明卿氏還佐州言

人之不可不學道猶其不可不習字也人焉而不習寫字則不能以記姓名通音耗故人皆習寫字人焉而不學道則不能以周旋人事居父母兄弟寮家鄉黨之間何以得為人乎而人不可不學道者何哉或云不待為學則固失之矣或云學能害人則學之不得其方而非學之罪也而知學道者以為聖人為標準其志非不高且切也然世之為此言者大率多流于

空言而要非實用何者字以義獻為至習字而義獻不可遽到則可廢而不習乎不能也學道而克舜不可遽及則可廢而不學乎亦不能也而中道而廢不習求進噫人徒知字之不可不習而不知道之不可不學豈非不知類之甚乎此聖賢之所深慨也兒玉氏之子明卿學于京師頃將歸求予之一言其志將以有為也道之不可不學也固熟之矣亦當告之欲其傳之同家諭之鄉人以其所學成己成物復甲告之然學亦非且夕之所能見効持之之久而攻之之專庶其有進乎

享保歲在乙卯季春日

贈元質言

攝有奇士元質生者多病好學其志將以有為也將歸大坂予謂之曰子觀夫良醫之治疾乎知其癘乎腹痞乎膈痿痺乎偏體不仁乎四肢也而後鍼砭以降之灸熨以散之湯劑以瀉之俾斯民壽乎無窮而免於札瘥夭閼之患為學者亦然或患博洽之癘或困記問之癘迫隘之癘狹介之癘亦隨為崇繼而弗救藥則將不可治也故為之師者隨材造就因病處方救偏疏滯使各全其天焉子若唯知治其身病而不知藥其心病焉則人雖曰之愈吾必謂之未愈心

病苟愈則身病不醫而自平矣一指肩背楨棘梧櫨孰重輕哉耕當問奴織當問婢聖賢人心之良醫也堯舜殂落孔子魯城孰從而醫之古不云乎文武之政布在方策子歸而求之必有餘師毋患勤矣哉吾亦未進乎此曰為贈

贈一柳立悅言

嚮有自東來者將歸鄉請予一言以箴之其人業醫予告之謂平素立志常以為良醫自期一柳立悅氏嘗自但州來遊學有年資敏而慤近者將還亦請贈言則亦業醫夫往聖遺言子之所常誦而習也固不

待子之臨岐繁瀆矣而又請子之贈言亦有他哉豈其欲指示其要以告之邪予之所告者亦豈外向所告人者而別有捷徑之可指秘旨之可授也哉但願回鄉之後出入起居常以為良醫自期不以毀譽得喪而有作輟則隨所聞見無不有進益其必為良醫矣其必不負所學矣若夫方術之妙診候之訣自有其師在非子之所與知也

享保九年五月

贈津田山根二生言

長州山陽之巨鎮也其俗尚文雅青衿之肄業造京者無虛歲向者津田山根二生亦負笈而來云其國

近開明倫之館署學職置典籍日講古聖賢之書以教邑子弟生在京有年業勤而才茂今茲秋將歸請一言以為贈曰謂之曰治古之世比屋可封豈戶喻人說而致然哉上躬其德而道化之所及無間遐邇故凡有血氣者不知其誰所為而自成敦厖醇懿之俗也苟欲迴九州之廣而人人而曉之則聖人亦勞矣今生處于黌庠之間行將膺司業之任駕古聖人之道以告于其君與其大夫士則其化之所被豈唯挾策上堂者而已哉薰陶漸摩之久也下邑僻壤窮海之區雖目不識字者亦將知善之當為與惡之當

不為人心自正風俗自醇而四方之國必來取法焉
勿以為迂而忽哉享保九年甲辰八月日

贈郝上方菴歸攝言

天地之間如此其無窮也古今之間如此其悠遠也
丈夫以六尺之軀立乎天地之間以百年之壽寄乎
古今之間豈翅稊米與瞬息也哉蚩蚩而生碌碌而
死不知人之所以為人之道而同榮枯于草木亦可
悲已將何以能盡人之所以為人之道而參天地而
不愧且古今而不朽哉吁亦難矣苟無其實而徒眩
耀其名聲以求聞于後世亦豈造物之所與也哉唯

要各盡其職分之所當為有生之間無一日間歇日
出而與日入而寐持其志而不倦焉則不求聞達而
萬古自不朽矣古之聖賢率皆如此方菴村上生業
醫而志儒頃將歸于攝丐言于予生固非銜名者也
亦善勤者也固不竢于言然貢諛辭以相誘非求言
之意也欲其專其業以成其志匹古之達者為告之

如此云正德歲乙未三月上旬

贈木村元春言

予嘗髫髻時及見信甫氏之升吾大人之門日接其
談論以脩予之不逮者多未幾而告別則予時年十

六信甫屬予曰吾有一姪名元春今甫九歲待齒及
 十六七必肄業于京師當時計後來時日尚須七八
 年所殊為久遠之想爾來信甫之書到言必及元春
 云弱植不耐遠遊待稍成立必相煩也及己卯之春
 遂持信甫書到則突而弁焉使之年則曰冠既二歲
 大焉之齒亦既向壯吁日月一紀迅於跳丸信甫之
 歸也予心嘗期後來不怠積以歲月則庶乎德進業
 脩有所成立以副信甫見屬之望為元春相觀之益
 遽到今日倏忽陳跡而奮學荒落大負前日之所期
 則固無及也今與君別却後十數年之後君之子若

弟姪之西遊亦非遠也恐予之業未成猶今日之顧
 前日則亦終于無聞焉而已然三年之艾追其言之
 則豈不可償已往之過哉而君之所進復如今日則
 亦非予之所望也秋田關左之巨藩而其人好學况
 有信甫之為叔依託得人尚而志勤而業欲毋素而
 餐欲毋墜而家聲則他日之所造其可量也哉

元春
 年壬午
 春三月

日晷儀者京城軍校之所製其製以小薄板濶一寸
 五分許長二寸五分許為臺植柱其上柱濶五分許
 亦以小板濶五分許為屋安柱頭其長皆齊羅經一
 箇窺屋板納之以正子午位屋端作小窺穿繩繫一
 小鉛錘垂之以正卯酉位柱兩邊畫辰巳未申日候
 而後測之則日景隨時射柱視畫知其候測畢按柱
 納錘收之則屋與小柱在臺上方正乃囊貯焉按元
 急遞舖安十二時日晷一箇朝鮮國亦有懸珠天平

銘類

日晷小儀銘

日晷儀者京城軍校之所製其製以小薄板濶一寸
 五分許長二寸五分許為臺植柱其上柱濶五分許
 亦以小板濶五分許為屋安柱頭其長皆齊羅經一
 箇窺屋板納之以正子午位屋端作小窺穿繩繫一
 小鉛錘垂之以正卯酉位柱兩邊畫辰巳未申日候
 而後測之則日景隨時射柱視畫知其候測畢按柱
 納錘收之則屋與小柱在臺上方正乃囊貯焉按元
 急遞舖安十二時日晷一箇朝鮮國亦有懸珠天平

仰益等日晷其製不可知然其用皆伺日景識時候
 實周公土圭測晷之遺法也今此儀甚小而不可四
 時改其候不以東西變其晷固簡而便演而大之則
 百刻之候亦可知矣置之精舍見日晷速移自起鞭
 勵之心則其益不特識時候焉仍系之以銘曰

羲和推轂兮驅茲隆曦
 羲和推轂兮驅茲隆曦
 軼朝賜谷兮運無停機
 君子體天兮夕惕孜孜
 研單匪懈兮口誦心惟
 吁彼懦夫兮玩日愒時
 乃諺乃逸兮顛蒙罔知
 昏其弗勵兮人其載而
 猛施鞭策兮毋負此儀

元祿辛未八月初五日
 硯銘 代家君

主水正中井君嘗藏一古研其質滑其形端而其製
 雅馴不煩刻鏤不事模擬天然渾成尤可嘉尚焉君
 素有巧思手製其匣君焉規度嚴正動合法制頃徵
 予其銘且索標其德曰書石端明三字而贈之按五
 代唐始置端明殿學士宋朝仍之蓋文士之清選而
 勲臣之優職也而漢研良者以端溪之產為最故喜
 事者官文房之具於硯則稱石端明若石氏帶官銜
 者然蓋貴之也夫人之正者曰端德之昭者曰明以
 此為稱豈亦不可耶易曰遠取諸物夫君子之於物
 也莫不取其理以用之於己君職冬官勤王事績用

茂著寵賚蕃渥苟官暇休日開爾匱拭爾硯顧名思義其為裨益豈淺淺乎哉銘云

龍壁之珍兮爰鎮文房重踰鼎彝兮貴於珪璋厥器

淵默兮厥德直方以贊化育兮惟其有章

序本藁

先生命予屬藁就加刪潤銘詞則一仍予本藁故今並存云

主水正中并君藏一古研其實滑其形端其製雅不煩刻鏤擬之功而渾成可尚珍愛之至手製其匣徵予銘因書石端明三字而贈之蓋漢土產硯之地以端溪為上而端明學士亦文士之清選也故後之好事者官文房之具以石端明稱之蓋人之正者曰端德之昭者曰明則以此為稱亦豈不可君職冬官勤王事績用茂著憲資蕃渥左右愛玩之餘顧名思義豈但雅硯之稱也哉取諸物非無益也銘云

古唐研銘

或携古唐研一方巧銘外方內圓八卦環于中因題法象二字銘以還之時享保十七年秋九月下漸也佗山之石敦琢作池方圓有象內外兩像八卦成列雲行雨施文房偉珍子孫攸宜

大湖石銘

并序

備州一武弁齋一烏石研山屬予賦詩其函題曰大湖石此中國之名產米老輩之所珍賞其膚理形裁不問知其為海外物因銘云

惟島治水玄圭告成厥貢怪石著諸群經大湖之產

唐玄質瑩暗中摸索自辨其名辛

丁字研銘壬午

約窓主人儒雅好文藏高雄石研一枚形方質澤其面篆丁字而池之命曰丁字研徵予為之辭為叙數語喜其為博文之資云

濡如其質挺然其形惟德其物明德惟馨博文正究二酉識字豈止一丁

硯銘

生駒丹州丈自阿州來寓于京師示予一研形模荷葉漢製尤巧徵名且銘之曰命以文荷系之詞云

芙蓉其模兮結隣其色猗嗟君子兮於玉以德靜而藏之兮惟玄惟默動而用之兮濡毫激墨世傳永寶兮其壽不億

富士石銘

小出君重元儒雅好文遠自攝南寄書云向回自東武面信州青山侯侯出小怪石形富士者與予曰此天方主馬所贈予先人者產于駿府今以寄予蓋侯之於小出君為從子徵子記其由為系以詞云斯石之模形富士乎富士之學勢斯石乎山之安者仁者之所樂乎宛然其貌愛之其所以樂之乎元祿壬午

之歲長
至日

夏號研銘

下村省字氏閱古董肆得端研一方紫而潤琢作馬蹄狀蓋刺之氣古者也請予其名漢時鑄幣為麟趾夏號之形以協嘉祉曰名之曰夏號以為銘云
渥洼之種于嗟乎龍兮絕塵之步千載遺蹤兮宜崇夏號之名曷假松滋之封兮甲辰

書厨字號銘

昔朱文公書閣題南軒藏書二字自題云於穆元聖繼天測靈開此謨訓惠我光明靖言保之匪金厥寶

含英咀實百世其美門人吳振意其為藏書閣銘請刺置社倉書樓文公曰只以此記書厨名待為別做予家素無藏書比年購求得二三十櫃櫃題文公字號而不足曰效顰別製八句以補之

懿茲顯道日星炳焉先哲建極億載永傳苟遺斯實書厨式愆服膺罔懈景行維賢元祿丙子之歲月正元日

倫中新見鎮城鐘銘

倫中國新見鎮關使君之封邑也元祿年中乃祖備州刺史相攸茲地依山為邑舊無鐘漏之設罔辨昏曉之分更直失時民用錯度寶永中始設更鐘爾後

屢鑄屢毀衆咸怪焉今僕襲乃考但州君之緒爰命
是氏新鑄洪鐘以候天時以辨人事庶不嘶不啞擊
則永發殷殷之洪音于晨于夕聞者務為孜孜之善
祖業永昌衆庶安生因系之以銘云

吉脩故國新見之鎮樓懸華鐘職在司辰庶受叩應
嚴暮警晨上律天時式利兆人享保十七年歲在壬子南呂之月

座右銘

跬步不可忘爾所生一日不可曠爾所職所生恩如
天忘天身斯覆所職惟身本忽本命必極惟非吾言
寔帝之則以此事君則為忠臣以此交人則不失德

癸巳中元日

盛藥層盒銘

盛藥層盒俗稱印籠以皮或薄木片為之質其高二
三寸許形橢而長漆飾之層層相嵌或三層或四五
層竅其兩端穿以絲繩以石或金玉為壓口與荷包
對繫以墜子佩之腰間古佩用之遺制也其稱印籠
豈本為貯印製而後專供盛藥之用仍襲用其稱歟
而華人未聞其製北山惟明製此器乞銘云

九轉蟠龍虎一元調坎離元祿乙亥十一月日

賀茂社酒殿石橋銘 代人

此橋舊以版架予懼其不經久遠今恭以石改造惟神有靈尚監悃誠以錫永祚因系以銘曰

邦畿之鎮賀茂之流通濟利涉宛轉虹浮玉甃沉影不朽千秋命匠伐石式答神休元祿八年乙亥十一月朔日後藤行忠敬建

石燈繫銘

京師人田邊正負父曰正義世以販紵為業屢往來南京家道浸殷日造石燈繫一坐奉獻于春日祠前胤曰系以詞云

明出地上德施維普維神有靈尚受純祐寶永七年庚寅五月

松筠硯銘

長州一友惠予一硯其質溫潤其色淺碧長可六七寸廣稱之額彫松竹醜石精巧可愛亦文房之清供

也因名之曰松筠硯銘曰

天姿挺特至粹所鍾綠質潤滑噴墨成龍亭亭斯竹

蒼蒼斯松刻鏤之精何讓化工貞享三年丙寅季冬

文臺銘 二首

幸化翁以二河八橋枯材製文臺見丐予銘因書以還之云

板橋旁午杜若芳洲王孫翩翩行歌風流枯株千載斷作文几且憑且嗟君子樂只

文臺之制出于縉紳家而好事者效而製焉其器傳于異邦有灑金文臺古倭漆几之稱而為文人韻士所尚亦文房之雅器也或以三輪杉木製之屬予銘曰銘云

三輪之山惟杉蒼蒼爰伐文几寶用無疆享保元年丙申臘月

建福縣志

或人得一古瓦研請銘云江州滋賀縣建福寺舊址
所得按寺以天智帝戊辰歲建距今殆千年吁古
矣哉其質朴其製緻鑿而池之宜為文房之重寶也
今夫瓦之為用本以蓋屋宇砌垣墻甃階除非有磨
礱敦琢之相非有鏗鏘駢闐之音其為物亦粗矣奚
足為人之所悅世遠千年用之今日細膩堅牢殆亞
端歛伴陳玄而交毛穎匱韜而裨裝豈今古器物良
苦之相懸如是耶將人之好尚貴耳而賤目耶蓋古
者事簡人朴製一器造一物必專其心力以成故雖

至粗之物貽之今日亦堪寶傳世趨末造奢侈相高
朝為夕弊人不暇給競為行濫之物以罔一時之利
工作器械堪傳之後世者亦甚夥矣豈特一瓦陶已
哉感為之銘云

用則庇風雨以覆人舍則資翰墨以傳遠古人專心
之効寶用之斯億萬

正德癸巳之
歲立秋日

防州德山鎮熊野新宮華表銘

山陽道周防郡德山鎮有熊野神祠本在紀伊
有田郡相傳推古帝二年神忽託邑人曰祠我爾
福邑民戮力乃刈榛夷險祠而祭之至應永年中大

內左京大夫義弘朝臣為置守戶重新厥宮邑舊名
 田邊以南紀有野上庄改曰野上承應中毛利日向
 太守隆就朝臣自郡之下松改宅于此爰作城鎮以
 綏有衆四民輻湊百事斯熙乃改邑曰德山今太守
 飛驒太守元次朝臣允文允武續其先績撫字邑民
 式安明神重葺祠宇附祭田若干裡祀以時奠享弗
 怠國有旱潦則禱焉民有疾疫則祠焉其地前有曲
 渚迴汀之勝船舶所泊茂松成行後臨本鎮逶迤西
 東關闡之富隴畝之沃蒼蒼之山渺渺之海映帶點
 綴乎左右前後此其景勝之大畧也其境方一步者

三千有七百面異位而宮有二華表相距百五十步
 頤伐石改造乞銘于予因系以銘云

德山之鎮周海之湄熊神之靈爰設行祠精禋不怠

星霜千斯宜國宜人錫爾純釐正德二年壬辰春三月日

南溟硯銘 并序

勢州託岸氏致一研云嘗得之是水翁翁得之土侏
 俟其采地之所產也求予銘為題曰南溟云
 產南海兮閩東州超和璧兮比天球

研匣銘 一品親王懇

天錫玄圭貴踰結鄰何以韞之奇木輪困爰啟爰瑩

郁郁文哉豈非藏器於身用捨隨時之材耶庚子五月

月落方池硯銘

玄泓窈兮陰魄明德至靜兮象利貞贊文運兮式化

成芥河氏請

藥匣銘代家君中津生野道現懇

祖述炎黃憲章岐雷濟民壽域措俗春臺

硯銘

端歛古質有瑩其光維德維功匪斯曷彰

三餘閣銘谷左仲氏懇

時而俛焉又勵其餘藏修游息事爾詩書丙午五月十日

研蓋銘

質管大如桶斷蓄充足珍工儻伐函研寄與好音人甲寅

車保

華匣銘應准三宮一品大王教

湘筠呈巧兔毫策勲靜則藏鋒動而成文寶永七年庚寅之夏

層盒硯蓋銘渡邊長藏懇

施一泓之澤傳千古之文其介于石兮守其玄蛟龍

起兮見在田其二

酒卮銘二首兒玉生懇

酒以合歡德將惟難○挹爾清持爾盈利爾貞

自鳴鐘銘 猪飼氏求

機緘密運，典天不已。顧器自強，慎勿怠棄。

笛筩銘 進藤兵部權太輔 懇 乙卯十月

柯亭異幹，韞匱斯藏。蕩邪滌穢，音協宮商。

硯匣銘 甲戌江晚菴 請代家君

端溪巨璞，文梓韜光。贊化之妙，爰秘爰藏。

硯銘 門田生懇本柳 本供嗣子之求 品大玉

誕敷文德，磨而不磷。受言藏之，輝光日新。

書寫寺甄研銘 壬寅池 見氏懇

書寫之峯，山陽之鎮。一片古甄，爰琢爰珍。

書案銘二首 己酉春為大坂兩 生與田壇上氏作

洋洋聖謨，爰閣爰繙。深造自得，庶逢其原。皇極彛訓，念茲在茲。對越罔違，為善攸攸。

法勝尾硯銘 乙巳四月 十七日

陶爾躬，虛爾中。玄爾功。

崇福研銘 辛丑歲江 左更白懇

陶其質，壁其潤。惟寶用彌，億年。

硯銘 辛丑歲前 田文懇

玄爾質，葆爾光。世寶用久，而彰。

印匣銘

維德之符匪信不立

小器銘 谷左 仲懇

月弄參差影風成錯落聲

印色池銘

煥乎有章我朱孔陽

銘義字後

銘云君子之行義以為質無適無莫其儀惟一

清水氏家廟榜聯

無念爾祖歲時盡如在之誠克勤于家雲仍報罔極之德

箴類

書几箴

環堵之室一步之宮闈竇無四壁之立應門少五尺之童儲無僭石書餘數架日出而誦誦而至晡日入而溫溫而徹夜雪窓鷄牖湏勵孳矻晨鐘暮鼓豈可優游國僑之四時盡是講習之地曼倩之三餘皆吾佔俾之秋聖經賢傳尊而閣之則此几即明堂辟廱亂臣賊子革而誅之則此几即狴犴圜業精則為褒善之華衮志倦則為收威之夏楚克勤克勩寸陰千金管城司戒敢告青衿

懋懋齋箴

乾元資始坤元資生民受厥衷式具性情其端維四
惻隱為本羞惡辭讓是非匪遠擴焉充焉火然泉達
燎原襄陵其大孰遏正路曰義安宅曰仁爰居爰由
是為大人聖謨啟蒙其明炳焉魯論斯作孟著七篇
人之道濟其言多歧眾說淆亂羣儒乘馳高者貪遠
虐恬是務卑泥空文唯事誦數或溺功利且派辭章
交攻迭蠹千孔百瘡爰索厥源行之弗及言浮乎實
辨論是急倍聖離道職此之由予創若時沆寡悔尤
有餘不盡不足勉而扁揭懋懋念茲在茲悚動警惕

篤信守死往哲有訓敢告斯士

元祿九載歲旅丙子律
中姑洗月念有四日

棲息堂座右箴

棲息堂德山毛利侯讀書之堂也侯平素好學耽書
頃者命予次第董遇譙周等語及溫公君子德勝才
等論以述座右箴曰做辛甲虞箴體代司書箴之
脩身之要非道曷得古今之變非學曷識述之者聖
載之者經三餘業足百遍義明譙周獨笑子產四時
古之君子孳矻如斯譬如累土以成層臺爰蓄其德
而勝其才維侯好文克務其德燕居讀書堂曰棲息
斯焉晨夕經史鼓吹文學司籍敢告執事

寶永五年戊
子重陽日

或持幅紙請書色荒箴曰題云

大欲之存禮惟隄防彼昏不知蠱惑如狂焦蛾爛蠹
徒爾自僵殞躬覆產集百不祥流楯之極闕國興喪
是故夏后深戒色荒甲寅歲

[Faint bleed-through text from the reverse side of the page]

贊類

神農贊

允厥民用作者曰聖咬咀百藥式濟疾病豈無其祖
炎帝司命丹青俎豆報本以敬冀賴遺化永壽夭橫
千載之後爰頌爰詠享保辛
庚夏五

武王贊

肅將天威燹伐大商取彼兇殘于湯有光黎民懷德
匪其玄黃匡是四國降之百祥

太公望贊

手島氏懇

屏居東海待天下清歸養西伯以逮武成鷹揚牧禁

九圍底平，嗚呼顯晦，與阿衡同其迹，而世澤與周公儼其名，千古之偉人，莫之與京乎。

關帝贊 後田氏懇 乙卯七月

志扶漢業，周旋隨君，勇冠諸將，絕倫逸羣，精靈千載，儀刑如生，於戲壯繆，惟國干城。

本傳隨先主周旋不避艱險諸葛亮曰猶未及髯之絕倫逸羣也羽美鬚髯故亮謂之髯

復窩贊

不有其己，知與物同，包容遍覆，仁施斯洪，行必復禮，節文以明，聖聖相傳，惟道之程 乙巳二月

贊舞陽侯贊 青木文藏懇本 加納侯家人請

附翼于鳳，攀鱗于龍，沛公參乘，舞陽受封，嘗持鐵盾，立帳前，脫其主于厄，窮又排闥直入，抗言悟其主，以正終人，唯稱先登，捕斬冠世之雄，孰復識善用其勇，勇以濟忠 壬子季冬 立春日

蜀昭烈贊

曹本奸雄，孫擅割據，惟茲昭烈，大義素著，况是帝胤，天眷人歸，折衝禦侮，曰羽及飛，忠規密勿，乃有孔明，君臣際會，千古是程 享保十年乙巳歲四月日 日州延岡鎮府下人懇

三將軍贊

商德貫盈，天厭其醜，假手有周，載詢厥咎，牧野陳旅

爰殪爰蹂維師孔武鷹揚赴赴白旗蒼兕昏受授首
肆除妖氛乃匡九有受封營丘繫裕爾後百世之師

其名不朽右周太師呂望

於懿留侯維漢藩屏貌貅厥勇處女厥形勢比破竹

智若建瓴去松辟穀黃石授經峻操偉節億載其榮

其則匪遠髦士攸刑右漢留侯張子房

木有樞栲玉有琬琰維公比德遺貌罔忝隆中韜晦

才美弗揜三顧其勤炎祚再熾巾幗雖徒白羽無玷

魚復石壘精誠其儼右蜀武侯諸葛孔明

楠公教子圖讚

乃心王室効力中原義方之訓教有淵源惟忠惟孝
萃于一門三百年後正氣凜存

扁鵲贊

嗚呼越人夙師長素飲上池水見垣一方五分八減

洞其陰陽鏡石時用診脉為名非能生死起其當生

隨俗為變萬世之程

宣聖四配像贊

唐虞之際五臣以治及周盛德十亂佐時自斯而降

曠世寥寥是故才難古言惟明闕里傳業造就群英

顏樂曾唯材達能成子思演繹孟獨得宗聖猷炳焉

臨池之妙造其精微點曳裁成露結煙霏嘗寫道經

籠鶯言歸千載獨步誰克嗣徽

小野道風朝臣像贊

朝臣姓小野大德冠妹子七世孫參議岑守之孫岑

守有二子長曰葛絃右京大夫次曰篁參議葛絃有三子朝臣其長子也與二弟元風伊風俱以善書名寬平五年生累官至從四位上內藏頭食邑河內德

昇殿歷事醍醐朱雀之朝累被寵遇天曆中與

江朝綱齊名帝嘗品之曰朝綱書劣道風道風才

劣朝綱康保三年十一月卒年七十四某年中尚書

土左氏所摹像藏在一故家頃右大辨藤公命工重

模見屬予其贊敬題其上云

秦漢以降世習草隸唯有右軍獨步千載朝臣之書

升堂入室心畫之妙本朝第一

贊仁字

贊曰人之安宅天之尊爵強恕而行餘裕其綽

楠河州訓子圖贊

丙午年孟夏秋田家
人求山下生紹介

孔明盡瘁於漢而子瞻得正卜壹效節於晉而胗肝
并命楠公精忠萬夫之望是父是子較古曷讓嗚呼
非義方之有素豈能一門忠孝永世之所仰哉

河州楠公畫像贊

帝室中微我圉孔棘有若楠公克一厥德孤忠自許
糾逖王厲殊功格天精誠貫日金剛之巔湊川之側
人之云亡遺容半幅右壬午之冬武部生懇

武田信州贊

區宇雲擾幾人稱雄扁視龍驤互相憑陵運徂百年
德音罔聞惟公巋然口碑遺勳取威定霸忒弁攸刑

人之云亡千載丹青壬寅之夏

有烈山氏贊

惟民有生外沴內傷匪有醫藥曷救夭殤始嘗百草
推尊烈山爰繫贊詞遺像儼然然叶韻會山韻女闕切語聲

宗聖曾子贊

洙泗倡道三千從遊忠恕之訓獨演聖猷戰兢臨履
終身持修其守惟約孰能與傳

馬師皇贊土州長尾生懇

馬師皇者黃帝時治馬醫也知馬形氣死生之胗理
之輒愈後有龍下向之無耳張口師皇乃針其唇下

口中飲之以甘草湯龍負而去夫義軒之世邈矣龍不可畜而針而藥之豈古有所謂豢龍氏者無乃是乎而後世神而傳之乎乙卯四月

捕正成像贊

掘氏門人正哲懇

王靈不競強藩跋扈螳怒鷓張誰能禦侮天降良弼

維肱維股蹇蹇其忠桓桓其武籌畧多方夙夜靡盬

孤城却敵一死報主丹青半幅輝映千古

孫真人像贊

別虎在側負小野玄林生懇

屬時多艱高尚其蹤聖童之器醫門之宗膽大心小

智圓行方遺訓昭然千古是常兼通玄訣龍席坎離

曰圖示象匪耀厥奇

長來君授書扁鵲圖贊

盧扁之術長桑是師私傳禁方飲以上池豈隱君子

欲得其人以壽斯民耶何其道之永世而不泯耶癸卯

歲為吉岡宗立位

郭令公像贊

完名高節祿壽併臻問安點頭子孫說說求之三代

以汝可謂利見大人

享保乙己歲豐原與田生懇。完名一句本傳語

屏風二大字贊

甲辰歲遺福山長英弟

孝弟

堯舜之道大哉蕩蕩其事孔迺親親長長

忠恕

曾演聖旨千歲如新忠以盡己恕以付人

三忠臣畫像贊

壬午

凶父唱虐既汰且頑幾諫丞丞人不格姦惟忠惟義
克扞國患人口是史萬世曷刪右小松内府平公贊

維嶽降靈生既岐嶷南河之野卧龍厥德惟肖有兆
匡是四國齊志不酬嗚呼惜哉右河内守捕公贊

龍馬致貢謹言諤諤折檻引裾比德曷作大臣之義
見幾而作進退有度餘裕於綽右萬里小路中納言藤公贊

黄石公贊

欲除祖龍之暴假手孺子以成不欲表其姓字遂使
後人竒其迹而詭其名

留侯贊

沙中擊推何其過強耶圯上進履何其無剛耶從容
借箸運籌帷帳此其所以貌若女子而為萬夫之防
耶

淮陰侯贊

國士無雙夙從漢王多多益善孰掩其功豈謀身之
不及吁高鳥盡而良弓藏功叶音姑黃切享保辛丑五月

張子房贊

蕭規曹隨以定漢鼎公密勿其間勲業惟並而稱漢
功臣則必言蕭曹至於丹青之歌詠之公之名獨高

豈其有所弗可及者曠世相傳而不舍耶享保丁未仲夏

鳴鳳朝陽圖贊牛山氏懇

至德感天朝陽來儀五采備珍千仞覽輝聖人之願

見之其欲逢聖之時耶

張長沙像贊和田了深懇

嘗舉孝廉臨民長沙伯祖是師精微有加慨宗族之

天開彙古訓之神方嘉惠後祀厥澤無疆庚子五月

雉畫贊癸卯臘月山本東溪懇

詠于詩載于書系于易卦服章取其文之華執贊取其性之介嗟彼微禽尚以德見取人而懋其德孰敢

予侮

下村靖字肖像贊

靖字先生名宗益字玄壽姓下村氏其所居號近雅堂生于勢州一身田在京師受醫業于丹水先生之門治宗長沙又受儒術于先人以醫鳴于時寶永初元叙法橋位正德五年晉階法眼享保七年壬寅歸老梓鄉其門人宗島貞紀肖其真曰令嗣惟文請贊時年七十二云

乃圭舉世龜鑑文史幾年鷄窓嘗周旋輦轂下何必

去父母邦享保九年甲辰臘月日

庄野玄三翁肖像贊

清福終身，將裕爾後。於素封善藥利世，期躋斯民於壽域。豈翅清世之為逸民，亦見陽報之本陰德。欲觀典刑，徵諸丹青。享保丙辰夏四月

日本三武將贊

捷過赤壁，功踰陰平。天縱勇智，維國干城。右原延尉義經
帝夢協靈，南木惟肖。是父是子，家聲耀耀。右楠河州正成
新羅之裔，爰基霸圖。計追韜畧，智過孫吳。右武田信州信玄

水石圖贊

乙卯三月安原生懇

峴峴平石盤礴，中坻波瀾。狂終古弗移，誰其似之。

靡靡之俗，滔滔之時。非獨立卓行者，其誰與之。

青砥圖贊

觀智律師求

千錢可惜，十錢亦爾。水中囊中，曷可一視。

竹画贊

己酉十一月小川土州求

纒見半身，含露態恍。疑千仞掃雲姿。

蜀先主贊

當塗兇悖，漢祚將傾。中山之胤，涿野起兵。關張禦侮，鼎足業成。顛沛匪虧，信義彌明。

關公贊

勇畧蓋世，偉勳回天。三約之表，君臣義全。秉燭達旦。

大節凜然白衣搖櫓遺恨千年

張公贊

萬人之敵惟邦之翰義釋嚴顏威良老瞞雲長斯亞
帝曹是翼國士有風武弁攸則

五靈圖贊

長澤粹菴氏圖五靈形狀巧予題其上夫聖王之馭
極固至德之所感稱明時之徵應者歟今審其意其
將幸值聖代將見之意歟抑冀遭聖人將遇之願歟
與夫好怪者之繪八駿談虛者之圖九牛固不可同
日而語也贊云

聖人出兮萬物覩至治洽兮靈禽聚麟振振兮鳳雛
雖馴白虎兮致龜龍時清穆兮政忠厚圖嘉瑞兮無
不朽頌治者兮汜可謔希聖者兮豈弗欽元祿丙子
上巳節

題十哲配聖圖

聖德天縱集厥大成循循善誘造就群英陳蔡之郊
患難相從俎豆千古永仰遺容

伯夷贊

周室肇基後嗣來幾秋春當時誇千駟不知又幾人
而今欲問迹片片付埃塵唯有首陽子其名千歲新

叔齊贊

弟兄尊卑列定，分奉天威，奈何世之季，多見闕于墻。孤竹有逸民，識得此義明。若微叔子節，那顯伯子清。

夷齊讓國事不見經。今姑據史記為替云。

題畫

辛亥臘月○霽
寰公呈上內

老幹查牙雲根峻，增其誰伴之風節。稜稜

又 水中石

屹乎中流，頽波是砥丈。夫巍然其德不移。

題畫

山峭崿而樓臺湧，水浩渺而雲樹擁。將何術而往從之，空悵然而對多時。已酉春

題畫龍

乙卯四月

靜而巖九淵，動而升九天。君子以時變安安，而能遷

題畫虎

旋乎威炳乎丈，杯杯族趨取群。藏其爪舍其牙，防陷

穽畏機加。

題畫蘭

湘纍高操千古不亡，謝家美譽久而益彰。託諸丹青，紫衣翠裳，深院無人，一室清香。

題朱槿紅蕉小畫

炎微異卉一堂競，豈非四海會同文明之象耶。

紹述先生文集卷之十二終

題画鶴高人

世間唯有鶴堪伴林下好呼梅做兄

小畫

休下向隆車張爾臂憐渠自分據胡盧

題鵝圖

越山有鳥其名曰鵝潛迹深松棲彼雀兔朱冠玄衣
雙雙徘徊圖而傳之曰能避灾癸丑冬日坊城壽寧公懇

紹述先生文集卷之十二終

